

## MANITUSHA KA UNAPEMIT ISHKUEU

Etuat Rich

Ekue papamutet ne napeu, ek<sup>u</sup> ne ishkueu nikuteu mani. Pepamutet ne napeu mani, ek<sup>u</sup> ne ishkueu nekutet. Ekue natat nenua uissitakua mani, uetamitakauat nenua uissitakua, ekute anite etaniti nenua manitusha, uetamitakauat mani.

— Nitakushin, nitakushin, etat mani.

Uet unuitatshimut ne atshinepik<sup>u</sup>, ekue pitukuat anite atamit, anite uianit. Katshi tshishi-aitutuati, ekue pitutshet anite kau ne manitush. Ekue tshiu<sup>et</sup>. Muk<sup>u</sup> eukuan eitit. « Tshekuannitshe eitit », itenimeu ne napeu, « eka ua nakatak ute ? » itenimeu.

Tshek ma iteu :

— Manashte mak au ! Nete itutetau.

Ekue ituteht anite, nete inika. Ekue tshiu<sup>et</sup>.

— Nipativen (tshekuannitshe petinak ? Utshishtemama put patinetshe).

Nuni-tshissitutuati nitshishtemam, nika natau, iteu.

Ekue natat, nemenu eshpatat (katshinassimeu nenua utishkuema). Nenu eshpatauat ka itamutaniti umeshkanaminu, eukuannu eshpatauat. Ekue nenua niatanikueni pashkutshitakua.

Ekue natat, ekue utamitakauat nenua uissitakua.

— Tekushinian, iteu nenua mishtikua.

Uet unuitatshimuniti, enikua nenua, mishta-tshinuapetshishinua. Ekue pushkutshikauat. Eshk<sup>u</sup> nana apu tat ne ishkujeu ka manashtet. Peminuepanit ne. Pushkutshikau, shikupatshikauieu, umikunu nenu — nenu eshpish umikut ne ishkujeu —, shakuashkupaniat anite assikut, ekue piminutat nenua utishkuema. Tshauapatat katshi aiteit, ek<sup>u</sup> tshetinat nenua utishkuema.

Tekushinit, shash tshishi-tamatshinua utishkuema. Uatshiat at. Tshauetapeht nenua.

— Shash nitshi kutuen tshitshinan, iteu.

— Eshe, itiku.

— Shash nitshi kutuen kie shash nitshi piminuen. Mitshishu ma, iteu nenua utishkuema.

Matshishut tapue ishkujeu, ekuaimatishut nenu uiashinu, tshisht nenu minu mushkaminu. Ueshinuat ne napeu katshi aitutuat.

— Tshipa ma an nishtushpuau tshinapem muti, iteu (tshetutat, eukuannu utishkuema).

Ekue patapishkuenit ne ishkujeu ekue shishishtikut.

— Eka ka ui nakatamin ute, eitune ma ute, itiku.

Ekue uapatinikut nenua unapema nenua atshinepikua. Tshatapamat nenua ekue mat. Shishishtiku (tanite eukuannu nenu umikunu uet mitshuat).

Eukuan eshkuapetshishit.